


«Daletgs par buca ad ureglia»

Igl Parc Natiral Bavregn a Viamala Turissem ân preschanto lur program da stad

■ (anr/bt) Igl Parc Natiral Bavregn a Turissem Viamala ân anvindo tut igls partenaris da la regiun par preschantar lur program par questa stad. Egna buna traintegna d'interessos davent da Veulden antoc ainten Avras en saradunos par schar s'infurmar. Egna buna traintegna da purschiders d'aranschamaints turistics da dafor a davains las Veiasmalas ân fulano la sala da l'ustreia Roffla an la Punt Crap. Christina Casparis digl Parc Natiral Bavregn a Daniela Gredig digl Turissem Viamala ân punctuo an lur salid l'impurtanza da l'infurmaziun vizendevla par c'igls giasts possian profiter da maniera optimala da quellas durànt lur segiurn an la regiun. Igl program anual digl PNB sacloma «daletgs par buca ad ureglia». Agl rom da quel ân anc liac egna veintvegna d'ocurenzas, davent da l'avertura da la stizun da giudimaint an la Posta Viglia da Ziràn par fitar cun la produziun da safràna a Valando. Tut quels aranschamaints en da catar sen la pagina digl PNB near digl Turissem Viamala. Els vignan ear publicteus agl calender d'aranschamaints «Viamala Actual». Sco spezialitads numna Casparis igls aranschamaints davart igl on giubilar da Benedetg Dolf c'â antschiert cugls konzerts digls cors da la Mantogna a da Schons a vean a fitar igl dezember cun la vernissascha digl cudesch davart que cumponist da Schons. Par la tearza geada organisescha igl PNB turs da viandar a saragatar par unfants ca passaintan dus gis se la tgamona da Cufercal. Da cuminanza cugl Parc Ela vean aranscho egn tgompar sculars primars. Igl 1. da fanadur vean inaugurada la savund'etapa da la senda d'evenimaints segl Pass da Glas. Miez fanadur vean inauguro igl albiert sen l'Alp Nurdagn ca porscha egna pintg'ustreia, egn dormitorio ad egna tgombr. Gredig mussa vei sen



Werner Furrer, manader da turs d'Eigias, planisescha seas turs cun las paginas electronicas.

FOTO B. TSCHARNER

la vasta purschida turistica ca cumpeglia ear uon puspe diversas excursiuns tier las minieras, spassageadas tras vitgs a vischnâncas, purschidas culinaricas, visitas digl mir da farmada an Val di Lei, visitas guidadas cun Tumasch Planta, viandadas

sen sendas da flurs, igl trekking cun asen se Maton ad igl giubileum «10 ons Streia da las Veiasmalas» par manzunar me egn pèr. Gredig fa ear a saver c'igl Turissem Viamala vegi par stgafir egna nova pagina d'internet, noua c'ign possi ear inter-

vagnir igl urari digl bus da viandar. Interssanta e la purschida digl PNB «sempel par return», egn'acziun ca vala segl antier antschieg digl parc, danunder c'ign po returnar a tgea cugl bigliet sempel, scha quel vean valido digl organisatur d'egn aranschamaint.

«Viandar e igl ple impurtant sport an Svizra»

Igl cunaschaint manader da viandar Werner Furrer d'Eigias (Igis) â infurmo davart igl GR-Hike, egn project c'igl cantun â lantscho par promover igl turissem da viandar agl Grischun. Egna retsheartga an que rom â musso c'igl segi da scular duple la cumpetenz digl purschiders digl turissem partutgant igl viandar, ca quels possian alura infurmar andretg lur giasts. An que rom â el fatg atent a las cunaschientschas da basa sco signalisaziun da las sendas, l'avertura da talas a las tgartas da viandar adatadas; partge igl viandar segi davanto igl sport igl ple impurtant an Svizra: 44% da la populaziun vomi a viandar. Igl viandaders en davantos egn factur economic: Els spendan an media 125 frâncs par gi. Savund que studi segi impurtant ca las sendas vignan betga catramadas. Ellas en sutamessas a la lescha stradala svizra ad en unifitgeadas an tut igl pajis. Parquegl salaschan ellas disfranztgear cun agid digl numers: 1–19 an rutas nazionalas, 21–99 rutas regionalas ad igls numers 101–999 en rutas localas. Las difficultads da quellas vignan mussadas cun las marcas T1–T4. Agl Grischun dati 16 300 liacs cun mussaveias cun 57 000 tavlas singulas.

Par s'infurmar davart las sendas dat igl ozigligi plenavànt las paginas electronicas da «SchweizMobil» near «map.geo.admin.ch», cun las qualas ign po parfegn planisar turs.

Tarvaschegns a Donat

■ Igl tarvaschegns digl vaschinadi da Donat â liac gievgia, igls 24 da matg 2018 a las 20.15 an tgea da scola a Donat.

Las fatschendas:

1. Parscret digl tarvaschegns digls 14-12-2017
2. Quent anual pigls 2017: a) Preschantaziuns a discussiun, b) Raport da la cummissiun da gestiun, c) Apruvaziun digl quent anual pigls 2017
3. Credit da 65 300 frâncs par egna cummoditad publica an tgea da scola a Donat
4. Credit da 25 000 frâncs par la cumpra da la parzela 143 a Mundalàn
5. Infurmaziuns da la suprastanza
6. Varia

La suprastanza comunala

Radunanza da delegos digl spital da Tusàn

■ (anr) La gievgia digls 24 da matg â liac la radunanza da delegos digl spital, a las 20.00 agl spital da Tusàn. Las fatschendas prinzipalas en sper las statutaricas surtut las infurmaziuns davart las consequenzas da la finanziaziun digls spitals a la situaziun da tarifas. Igl delegos ân da dezider davart project d'investiziun par reorganisar la partiziun d'urgenza. Alura ân liac ligidas par completar igl cunzegl d'aministraziun a surtut la tschearna digl pursura nov: proponieu e Curdin Capaul.

Essas Vus gia commember?

Procap Grischun
Hartbertstrasse 10, 7000 Cuira
Tel. 081 253 07 07, PC 70-7755-0
www.procapgrischun.ch

procap grischun

RTR Radiotelevision Svizra Rumantscha

SRG SSR

www.rtr.ch

al puls dal Grischun

RADIO

14.03 LA STAILALVA (rep.)

Power da dunnas

Duas bands cun lur album da debut!



La band Hârz, quai èn 6 dunnas da la Svizra tudestga. Ellas èn cun corp ed olma dunnas e mammas che dattan tut da metter la lètg, il perchasa, il mastergn ed ils uffants sut in tetg. Mo ellas han anc in'otra gronda passiu: il chantar! Rebecca, Anna, Louiza e Lisa, ellas èn l'emprima girlgroup band da schlagger da la Germania. Las quatter dunnas scharmantas vegnan a dar nov schlantsch a la scena da schlagger. Pia ina «La stailalva» cun power da dunnas spetga oz sin vus e cun in zichel cletg pudais Vus gudagnar il disc da la band Lichtblick. Bun divertimento e buna fortuna!
Redacziun: Christa Soliva

BATTAPORTA
VOSSA VUSCH EN LA RAIT
battaporta.ch

RTR Radiotelevision Svizra Rumantscha

15.03 SOUNDCHECK (rep.)

Il «Soundcheck» cun sound nov dal matg



Ils songts da glatsch èn svanids – nairas uras per nov sound! Quest «Soundcheck» è in soundtrack da primavaira! Da Sedrun sur Turitg fin vi sin l'insla britannica! Il «Soundcheck» cun nova musica da Frank Turner, Abay, Evelinn Trouble, Hess & Friends e blers auters. In perfetg soundtrack per in perfetg di da matg – tutina sch'i plova u dat sulegl.
Redacziun: Patrick Capaul

19.00 NOSS CHORS

Chantar en per Chiavenna – en «La Canorta» da RTR



En bun duas emnas chantan chors grischuns mordio a la festa chantunala da chant a Chiavenna – RTR sa prepara cun Vus. En l'emissiu «La Canorta» è il chantatur passiuà Guido Derungs voss ospitant. Cun var 50 onns experienscha sco chantatur en dus differents chors sa el da tge ch'el discorra ed è pront per sa

preparar ensem cun Vus sin la gronda festa «Rezia Cantab» dals 8 fin ils 10 da zercladur a Chiavenna.
Redacziun: Guido Derungs

TELEVISIUN

13.55 CUNTRASTS SIN RTS2 (rep.)

4x4 – In di da primavaira part 1



Quest onn èsi 80 onns ch'il suveran svizzer ha approvà il rumantsch sco quarta lingua nazionala. En Svizra discurren var 60'000 persunas rumantsch. Els «Contrasts» vulan savair: Tgi èn quels Rumantschs? Tge fan els? E co vivan els? Nus accompagnain durant 4 stagiuns – mintgamai 4 Rumantschs durant in di. Quai è «4x4». Durant in di da primavaira essan nus stads tar: Tinet Michael da Valchava, Eva Camenisch da Laax, Serafin Caviezel da Vrin e Madlaina Capeder Sonder da Salouf.

17.40 TELESQUARD SIN SRF 1

L'emissiu d'infurmaziun sin SRF 1 cun suttitels tudestgs sin TXT 777 (rep. sin SRF info tranter las 18.00 – 22.00)

dapli sin www.rtr.ch

RTR RIMNA PER ILS ROHINGYA

Mesemna, ils 23 da matg 2018, rimna la Chadaina da Fortuna ensem cun la SRG SSR daners per la minoritad muslima Rohingya. Ina da las centralas da collecta da telefon vegn endrizzada tar Radiotelevision Svizra Rumantscha (RTR) a Cuira. Donaziuns pon vegnir fatgas a partir da las 06.00 fin las 24.00 via il numer da telefon gratuit 0800 87 07 07 ubain er sin www.rtr.ch.

ROHINGYA EN PRIVEL
APPEL DA DONAZIUN URGENT

CHADAINA DA FORTUNA
LA SVIZRA SOLIDARICA

DONAZIUNS
CP 10-15000-6
REMARTGA «ROHINGYA»

DA CUMPAGNIA

25-05-2018, 20:00, FORUM IM RIED, LANDQUART

Concert cun musica d'Invivas e da la scola da musica Landquart e conturn
Prelecziun d'Arno Camenisch

Dapli sin www.rtr.ch

RTR Radiotelevision Svizra Rumantscha

al puls dal Grischun